



₹ 5/

तुबारि

www.pangi.inअब अंग्रेजी, हिन्दी त
पंगवाड़ी भाषा अन्तर असी।

Issue 87; Sep 2019

बिषय सूची

दरियोए बोक	1
गुरुजी	2
तुं जम्मुण कोई गलती ना भो	3
लखे टके बोक	4
चुटकले	4

दरियोए बोक

ई बोक सुआ पुराणी नेई। कुछ गुओरु यक दरियेउ केई पुओणी पीण जे गे। गुओरु पुओणी पीणे बि की दे, दरियोए हुशैरी दी कइ बोलु, “में पुओणी ना पिए।” त यक गुओरु बोलु, “किस? असी सुआ टिश लगो असी। तु असी पुओणी पीण केआं किस रोकुण लगो असा?” दरोयोए बोलु, “इस पुओणि पी कइ तुस मर घन्ते।” दोके गुओरु बोलु, “कीं लेहरोंठी लेहरोंठी बोके करण लगो असा तु। पुओणी पी कइ बि कोउं मरता ना?” दरियोए बोलु, “तुस बिल्कुल सही बोलुण लगो असे। पुओणी पी कइ कोउं जेई ना मरता। पर में इस पुओणी पी कइ तुस मर घन्ते किस कि एस अन्तर जेहर मिओ असा।” टेके गोरु उशकी कइ बोलु, “तु अतर नकठर कपल केआं भुआ? दरियो त टिशो मेहणु के टिश मुकांती त तेई अस अपु पुओणी पीण केआं रोकणे लिए एस अन्तर जेहर मियाई छड़ा ना?” दरियोए बोलु, मेई अपु पणि अन्तर जेहर नेई मियाओ। में त कमे असु टिशो मेहणु के टिश मुकाण। अउं त अपु निसणे जगाई केआं साफ सुथरा ठना त शुचा निसता।” चौथू गुओरु बोलु, “त फि तें पुओणी अन्तर जेहर केनी मियां?”



खास दन



**तुबारि टीमे कनारा सोबी पांगेई
मेहणु एचेल चलो जाठि के बधेए।**

17 सितेम्बरे - आलुणे धनीश
29 सितेम्बरे केआं – नव रात्र

धाणि त तसे जुएली

केआं अब सते बंटी
अठ फेरे लवाण
चाहिए। सत फेरे
तेके व्याहे, आठु जे फेरा असा,
से कुई जे लवाण चहिए कि से
कुई बचान्ते त तेस पढान्ते ।



दरियोए बोलु, “मेहणु।” सोबी गुओरु यक सात पुछु, “मेहणु! किस?” दरियोए बोलु, “मेहणु में ओत कोत बइ सुआ कारखाने बड़ाई छओ असे। तेन्हि अन्तरा निसो गन्दफन्द मोउं अन्तर फटांते, जेसे बेलि में पुओणी जेहरीलू भोई गो असु। इठियाणि मेहणु त अपु सोब रंगाइ, प्लाष्टिके बोटल, लिफापा, होर शिशे, दुवाई डाबे, बेटरी सेल मोउं अन्तर छते। त में पुओणी अब पीणे लेएख नेई रिहो।” दरियोए मेहणु के होरे कारनामे गुओरु जे बताई कइ बोलु, “तुस अगर में पुओणी पियेल त जरूर मरी घन्ते।” दरियोए बोक शुण कइ गुओरु सोचुण लगे, “मेहणु बि की जानवर बण गा ना? तस कोई पाता ई नेई लगण लगो कि ब्यार त पुओणी खराब त गन्द कर कइ सिर्फ होरी जीवी के ना बल्कि अपु वाजूद बि खतरे अन्तर छड़ण लगो असे। अपु खूर पुठ झेउठ देणे बोक ना भो ना, ए?”

तुबारि पत्रिके अन्तर छपो सोबी लेख, त कथा अन्तर भुओ विचार सिर्फ लेखके भो। तुबारि पत्रिके एसे कोई जिम्मेबारी नेई। तुबारि पत्रिका सिर्फ भाषा सुहलियत करण जे यक मंच देण लगो असी।

हैं पता:

तुबारि पत्रिका
हरी जरनल स्टोर,
किलाड़ बजार, त: पांगी
घाटि,



गुरुजी

यक दिआ ई असे तुस।

में मने कोठि टगड़ियार छांते,

ज्ञाने दिआ जाई कइ।

यक जोसणे ई असे तुस।

मठड़ियारी अन्हारु मुकाई छांते,

शिचणे लुहु दी कइ।

यक दुआरे ई असे तुस।

खोल छते ज्ञाने भण्डार,

दुनिये सुआ जानकारी दी कइ।

पुओणि ई असे तुस।

धोई छते में मने गंदगी,

भलाई त बुराई बारे शिचाल कइ।

भगवाने यक अवतारे ई असे तुस।

नासमझ त बेअक्ली केआं असी बचाणे लिये,

तुं जेई कते, गुरुजी

तुं जजबात त तुं हौसंले लिये।



तुं जम्मुण कोई गलती ना भो (भाग-2)

हैं सोबी के करता-धरता परमपिता परमेश्वर भो, जे तुसी ईए पेटे अन्तर बणांता अओ असा त तुं मदत कता। तुं जन्म कोई गलती ना भो, होर ना इ तुं जिन्दगी कुदरते देण भो। भले ईं तुं ईए बोउए तुसी जमाणे योजना न बड़ाओ भोल, पर परमेश्वरे जरूर तुसी बणाणे योजना बड़ाई रखो थी। से तुं जम्मुण हेर हैरान न थिए, बल्कि तेन्हि त तुं आश थी।




तुं ईए बोउए सोचुणे सुआ पेहला ईं, तुस परमेश्वरे विचार अन्तर पैदा भुओ थिए। तेन्हि ईं सोबी केआं पेहला तुं बारे सोचु। ए कोई तुं भाग, किस्मत, मौका या संजोग न भो कि तुस इस टेम जीन्ते असे त सांस नेण लगो असे। तुस तोउं जीन्ते असे किस कि परमेश्वर तुसी बणाण चहांताथ।



परमपिता परमेश्वरे तुं जिसमे हरेक अंग अपु अपु जगाई लओ असे। तेन तुं उच्चाई, तुं रंग, तुं झशुडु त होरे अंग सोच-समझ कइ बड़ाओ असे। तेन तुं जिसम अपु इच्छाई मुताविक बड़ाओ असा। तुं स्वाभव, गुण त अनोखा व्यक्तित्व बि तेन्हि बड़ाओ असा। तसे यक बोडा भक्त बोता, “जपल अउं नियकइ कइ बणुण लगो थिआ, त धरती टुन्नि रचीण लगो थिए, तपल में हलोटे परमपिता परमेश्वर केआं नियोको न थिए।”

किस कि परमेश्वरे तुस यक बड़ाई जे बणाओ असे, तोउं तेन्हि ईं बि ठीक किउ कि तुस कपल जम्मते त कतर रोज जीन्ते रेहन्ते। तेन्हि तुं जम्मणे त मौती टेम चुणी कइ तुं जिन्दगी दन पेहलाई केआं ठेहराई छओ असे। धरम शास्त्र बोता, “तैं टीरी अउं तिखेईं काई छो थिया, जिखेईं अउं सिर्फ बती ईं थिया; त में सोब अंग जे हरेक रोज बणते घेन्तेथ, तेन्हि बणाण केआं पेहलाई तैं कताब अन्तर लिखो थिउ।”

परमेश्वरे ईं बि ठेहराऊ कि तुस कोठि जमते त तेन्के मकसदे लिए तुस कोठि बिशते। तुं जाति त तुं राष्ट्रियता कोई गलती न भो। परमेश्वरे किछ बि संजोग पुठ छइ न दुतु। तेन्हि सोब किछ अपु मकसद पूरा करणे लिए उपया बड़ाई कइ कियु। धरम शास्त्र बोता, “तेन यके मूल जुओई मेहणु के सोब जाति.....त तेन्के ठेहरो टेम//भक्त होर बिशणे जगाई सीमा तोउं बन्हो असी।” तुं जिन्दगी अन्तर अपु मरजी जुओई किछ बि नेइ बल्कि ए सोब किछ यक मकसदे लिए असु।



सोबि केआं हैरान भुणेबाड़ी बोक त ईं असी कि परमेश्वरे ईं फैसला बि निया कि तुस कीं जमते। तुं जमणे टेम या तुं ईं बोउ कोउं भो, एन्हि सोबि केआं अलग तुसी बणाण अन्तर परमेश्वरे यक उपया थिया। एसे बेलि कोई फरक ना पड़ता कि तुं ईं बोउ खरे, बुरे या उदास किसमी असे। परमेश्वर जाणताथ कि से तुसी कीं बणाण चहांते, तीं बणाणे लिए तेन्हि दुहि अन्तर सही ढंगे गभुरु जमाणे तागत थी। तेन्हि अन्तर से DNA थिया, जेसे जरूरत परमेश्वर, तुसी बणाण लिए थी।



भगवाने समाणी शयद तुं नजैज ईं बोउ भोई सकते, पर नजैज गभुरु कदी न भुन्ते। सुआ गभुरु ईं भुन्ते जेन्के ईं बोउ होता तेन्हि जमाणे ना चहांते। पर फि बि से परमेश्वरे योजने हेस्सा भुन्ते। परमेश्वरे मकसदे मेहणु गलतिइए ना बल्कि पाप बि अपु हिसाब अन्तर नी छओ थिया।

परमेश्वर ना त कोई कम गलती जुओई कता, होर ना त से कदी गलती कता। हरेक सृष्टि पतू तसे यक मकसद असा। हरेक बुटे त जानवर परमेश्वरे योजने बेलि बणो असे त हरेक मेहणु यक कमसद जुओई बड़ाओ असा। तुस बणाण अन्तर परमेश्वरे मकसद तसे परेम थिया। धरम शास्त्र बोता, “जीं तेन अस सृष्टी बणाण केआं पेहलाई अपु अपफ अन्तर चुण छओ थिए कि अस तसे भेएइ परेम अन्तर शुचे त नरदोष भोल।”



इस मतोक बणाण केआं पेहला ई परमेश्वरे तुं बारे सोच छओ थियु। तोउं त परमेश्वरे ए बड़ाऊ। परमेश्वरे इस ग्रहे वातावरण ई बणा कि अस एस अन्तर रेही सकियेल। अस तसे परेमे केन्द्र-बिन्दु त तसे पूरी सृष्टी अन्तर सोबी केआं ज्यादे कीमत बाड़े असे। धरम शास्त्र बोता, “तेन अपने मरजी जुओई अस सच्चे वचने बेलिए पैदा किए, ताकि अस तसे बणो चीजी अन्तरा यक किसमी पेहला फल भोल।” एसे बेलि पता लगता कि परमेश्वर असी जुओई कतो परेम कता त तुस तसे लिए कतो किमती असे!

परमेश्वरे ए सोब संजोगे बेलि ना, बल्कि बोडे बरीकी जुओई बड़ाओ असु। भौतिक वैज्ञानिक, जीव वैज्ञानिक त होरे वैज्ञानिक जतरु सुआ इस ब्रह्माण्डे बारे पता लान्ते, ततुरु सुआ असी खरे कइ पता चलता कि ए कतो सोच समझि कइ हैं लिए बिशुण जे बड़ाओ असा।

लखे टके बोके

- ♦ बैर रखणे बेलि त झगड़े फसाद पैदा भुन्ते, पर परेमे बेलिए सोब अपराध या पाप ढकि घेन्ते।
- ♦ जेठि सुआ बोके भुन्ति, तेठि गुनाह बि भुन्ता। पर जे अपु मुँह बन्न रखता, से अक्लदारी जुएई कम कता।
- ♦ जपल घमण्ड भुन्ता, तपल बेज्जती बि भुन्ती, पर सधे साधे मेहणु अन्तर अक्ल भुन्ती।

तुबारि मासिक पत्रिका

- ♦ अस इ उम्मीद करूं लगो असे कि एण बाड़े रोज अन्तर सुआ मेहणु इस कम अन्तर साथोट देन्ते।
- ♦ इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगी घाटि अन्तर पदुं जे त भाषाई सुहलियत करण जे इ पत्रिका शुरु किओ असी।
- ♦ तुबारि यक अवाणिज्यिक पत्रिका भो।
- ♦ तुबारि पत्रिका कोई मेहणु, जनजाति, त संस्कृति गलती कदण जे नेई छपाण लगो। अगर कोई ई सोचता बि त अस जिम्मेबार नेई।
- ♦ छपाणे पेहले सोब आर्टिकल दुई टाई पांगेई मेहणु हरालो असे। इ त खुली बोक असी कि पेहलि बार पांगवाडि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।
- ♦ आर्टिकल्स ना मिलल, या घाटि मेहणु के साथोट ना मिलल त तुबारि पत्रिका कदी बि बंद भुई सकती।
- ♦ कोई चीज छपां असी या नेई छपां जे तुबारि संपादकीय टीम पुरा अधिकार असा।
- ♦ अस किलाड केन्द्रीय पुस्तकालय, त बजार हरिराम लाले दुकान अन्तर तुबारि ड्रॉप बॉक्स पुठ बि अपु सझाव ओर आर्टिकल्स रखुं जे सुविधा किओ असी।
- ♦ अस सोबी पांगी मेहणु जे हात जोड़ कइ अनुरोध कते कि, तुस बि कोई अच्छा आर्टिकल, पुराणि या नोई कथा, कहावत, कविता, त नोई घीत (पागवाड़ी अन्तर) लिख कइ छपां जे हेंघे दिए।

तुबारि संपादकीय टीम

- ☎ 9418429574
- ☎ 9418329200
- ☎ 9418411199
- ☎ 9418904168
- ☎ 9459828290



चुटकले

- 1- मास्टर: गभुरो सोबि केआं ज्यादा सुन्ना कोठि मेता?
प्रिया: मास्टर जी, सोबि केआं ज्यादा सुन्ना में ईए टरांक अन्तर मेता।
- 2 राजु: तन्ख्वाह यक या दुई तारीख किस मेती?
15 या 16 तारीख किस ना मेती?
संजु: ताकि तुस टाई किसमी जिन्दगी जी सकियेल। पेहले 10 रोज अमीर, होर 10 रोज गरीब त अखिरी 10 रोज फकीरी मज्जा नी सकियेल।